

Na osnovu Zakona o predškolskom odgoju i obrazovanju ("Službene novine Kantona Sarajevo", broj 4/98), člana 35. Zakona o osnovnom obrazovanju i odgoju ("Službene novine Kantona Sarajevo", broj 7/98) i člana 36. Zakona o srednjoškolskom obrazovanju ("Službene novine Kantona Sarajevo", broj 11/98), Zakona o izmjenama i dopunama Zakona o predškolskom odgoju i obrazovanju ("Službene novine Kantona Sarajevo", broj 9/2000), Zakona o izmjenama i dopunama Zakona o osnovnom obrazovanju i odgoju ("Službene novine Kantona Sarajevo", broj 9/2000) i Zakona o izmjenama i dopunama Zakona o srednjoškolskom obrazovanju ("Službene novine Kantona Sarajevo", broj 9/2000), ministar obrazovanja, nauke i informisanja Kantona Sarajevo, donosi

## **PRAVILNIK**

### **O OSNIVANJU I RADU EKSPERIMENTALNE ŠKOLE I PREDŠKOLSKE USTANOVE**

#### Član 1.

U cilju provjeravanja kvaliteta i efikasnosti nastavnih planova i programa i uvođenja novih oblika i načina rada, nastavnih sredstava, tehnologija i sl. u odgojno-obrazovnom radu, može se osnivati nova odgojno-obrazovna ustanova ili se postojeća kao cjelina ili djelimično može proglasiti eksperimentalnom.

#### Član 2.

Radi unapređivanja odgojno-obrazovnog procesa Ministarstvo obrazovanja, nauke i informisanja Kantona Sarajevo (u daljem tekstu: Ministarstvo) formira stalnu Komisiju koja prati i predlaže inovacije u skladu sa ciljevima iz člana 1. ovog pravilnika.

#### Član 3.

Eksperimentalna škola i eksperimentalna predškolska ustanova, razred, odjeljenje ili odgojna grupa svoj rad planira na osnovu odobrenog programa eksperimenta.

#### Član 4.

Odobrenje za uvođenje novih oblika, načina i sadržaja rada u odgojno-obrazovnoj ustanovi (predškolska ustanova, osnovna ili srednja škola) daje se na osnovu elaborata koji se podnosi Ministarstvu.

#### Član 5.

Škola ili predškolska ustanova proglašava se eksperimentalnom ako su elaboratom uključena sva odjeljenja škole, odnosno sve odgojne grupe predškolske ustanove.

#### Član 6.

Odjeljenja ili odgojne grupe proglašavaju se eksperimentalnim ako su elaboratom uključeni samo neka odjeljenja ili odgojne grupe.

#### Član 7.

Prema proceduri utvrđenoj ovim pravilnikom, ministar obrazovanja, nauke i informisanja (u daljem tekstu: Ministar), daje saglasnost i na druge projekte koji se realiziraju u odgojno-obrazovnoj ustanovi u sklopu pojedinih oblasti ili djelatnosti.

#### Član 8.

Pored komisije iz člana 2. prijedlog za uvođenje eksperimenta mogu podnositi i druga zainteresirana domaća ili strana pravna ili fizička lica, uz obavezno prilaganje elaborata koji sadrži sve elemente date u čl. 9. i 10. ovog pravilnika.

#### Član 9.

U elaboratu se mora istaći u čemu se traži odobrenje za odstupanje od odredaba odgovarajućih zakona, eksperimentalni nastavni plan i program koji se želi primijeniti sa posebnom analizom odstupanja od važećeg nastavnog plana i programa (sadržaji, plan, dnevno i sedmično opterećenje učenika, drugačija dinamika izvođenja nastave i sl.) i drugo što bi jasnije ukazalo na značaj i prednosti primjene predloženih sadržaja.

#### Član 10.

Pored istaknute i obrazložene potrebe za promjenama koje se eksperimentom provjeravaju i zahtjeva preciziranih u članu 8., elaborat treba da sadrži i sljedeće elemente:

- cilj, zadatke i sadržaj,
- mjesto i način izvođenja,
- vremenski plan realizacije,
- prostorne uvjete,
- uvjete po osnovu opreme,
- kadrovske uvjete,
- način stručnog praćenja,
- rok podnošenja izvještaja o postignutim rezultatima,
- izvor finansiranja eksperimenta (projekta),
- finansijski plan za svaku godinu,
- definisan uzorak,
- prijedlog ustanove, odjeljenja, odnosno grupa u kojima se želi realizovati eksperiment (projekt).

#### Član 11.

Za sagledavanje opravdanosti provjere vrijednosti novih obrazovnih sadržaja, oblika, načina rada i nove nastavne opreme, za svaki pojedinačan zahtjev Ministar formira posebnu komisiju koja razmatra elaborat i daje prijedlog Ministru da ga odobri ili odbije.

#### Član 12.

U slučaju da Ministar odobri zahtjev, komisija iz člana 11. ovog pravilnika će predložiti i ustanove u kojima se eksperiment ili projekat može realizirati.

#### Član 13.

U slučaju da zahtjev podnose lica iz člana 8. ovog pravilnika, škola ili predškolska ustanova koja je prema rješenju Ministra proglašena eksperimentalnom, u cjelini ili djelimično (samo neka odjeljenja/ grupe), sa nosiocem eksperimenta potpisuje ugovor.

Ugovorom se preciziraju svi relevantni elementi za realizaciju projekta i međusobne obaveze ugovornih strana.

#### Član 14.

Realizacija eksperimenta može početi ukoliko je odobrenje Ministra za njegovo provođenje dato najmanje tri mjeseca prije početka školske godine.

#### Član 15.

Škola, odnosno predškolska ustanova, koja je proglašena eksperimentalnom pravovremeno preduzima organizacione pripreme u skladu s projektom iz čl. 8. i 9. ovog pravilnika i u svom godišnjem programu rada planira aktivnosti.

#### Član 16.

Eksperimentalna škola odnosno razred ili odjeljenje gube svojstvo eksperimentalne škole, razreda ili odjeljenja ako prestane ispunjavati uvjete za vršenje eksperimenta, ili jedna od strana prestane ispunjavati uvjete ugovora iz člana 13. ovog pravilnika.

Ministar obrazovanja, nauke i informisanja donosi rješenje o obustavljanju projekta.

#### Član 17.

Ovaj pravilnik stupa na snagu danom donošenja, a bit će objavljen u "Službenim novinama Kantona Sarajevo".

Broj 11-04-38-886

22. maja 2000. godine  
Sarajevo

Ministar  
prof. dr. Safet Halilović, s. r.

Na osnovu člana 150. Zakona o srednjoškolskom obrazovanju ("Službene novine Kantona Sarajevo", broj 4/98) i Zakona o izmjenama i dopunama Zakona o srednjoškolskom obrazovanju ("Službene novine Kantona Sarajevo", broj 9/2000), ministar obrazovanja, nauke i informisanja Kantona Sarajevo, donosi